



**KEMENTERIAN PERTANIAN
DAN KETERJAMINAN MAKANAN**

TEKS UCAPAN

**YB DATUK CHAN FOONG HIN
TIMBALAN MENTERI PERTANIAN DAN KETERJAMINAN MAKANAN**

21 OKTOBER 2023 (SABTU) | 2.30 PETANG

**PROGRAM SENTUHAN AGRO MADANI
PERINGKAT NEGERI SABAH**

Selamat Petang, Salam Sejahtera dan Salam MADANI,

(RUJUK SALUTATION)

PENDAHULUAN

1. Saya amat berbesar hati berada di sini untuk bersama-sama para hadirin sekalian untuk merasmikan satu lagi program yang dianjurkan oleh Kementerian Pertanian dan Keterjaminan Makanan Malaysia demi penstrukturan semula ekonomi dan melonjakkan pertumbuhan selaras dengan kerangka ekonomi MADANI memperkasakan rakyat.
2. Di kesempatan ini, saya merakamkan ucapan terima kasih dan syabas kepada Lembaga Pertubuhan Peladang (LPP) yang telah bertindak sebagai Agensi Pelaksana Program Sentuhan Agro Madani Peringkat Negeri Sabah yang diadakan sepanjang dua hari ini.
3. Saya dimaklumkan pelbagai aktiviti-aktiviti dan acara yang diatur adalah berinspirasi konsep Malaysia MADANI yang menekankan ihsan serta penyatuan insan yang menyantuni keseluruhan aspek kehidupan mengintegrasikan elemen politik, sosial dan ekonomi dalam masyarakat Sabah khususnya.
4. Dari sudut KPKM sendiri, program yang dianjurkan menunjukkan keseriusan Kerajaan dalam menangani isu kos sara hidup rakyat dan mengambil peranan sebagai keterjaminan bekalan makan supaya sentiasa mencukupi dan tersedia buat seluruh rakyat.
5. Antaranya, Jualan Agro MADANI diadakan pada hari ini bagi meningkatkan **Kebolehcapaian** dan **Ketersediaan** bekalan serta memudahkan pengguna mendapatkan bekalan produk-produk segar pada kadar harga yang munasabah dan berpatutan.
6. Jualan Agro MADANI juga dapat memberi ruang pasaran tambahan dalam meningkatkan pendapatan peserta program ladang kontrak dan usahawan dengan konsep jualan terus kepada pengguna.

7. Saya yakin KPKM akan meneruskan perancangan dan hala tuju dengan melaksanakan perubahan anjakan paradigma bagi memastikan negara mempunyai bekalan makanan yang mencukupi disamping kesejahteraan dan kemakmuran warga komuniti Peladang, Penternak dan Nelayan akan terus terbela.

YBHG DATO'/TUAN/PUAN/HADIRIN SEKALIAN,

HUBUNGAN JABATAN/AGENSI KERAJAAN NEGERI SABAH DENGAN KERAJAAN PERSEKUTUAN

8. Saya percaya Kerajaan Persekutuan dan Kerajaan Negeri Sabah sentiasa komited untuk terus bekerjasama bagi memastikan kesinambungan pembangunan sektor agro makanan dalam agenda ketersediaan dan keterjaminan bekalan makanan Negara.
9. KPKM juga sentiasa berusaha melaksanakan pendekatan baharu dalam menangani isu keterjaminan makanan melalui pertanian berskala besar bagi peningkatan pengeluaran padi dan beras, pemodenan teknologi pertanian, penglibatan pihak swasta dan pemain industri, pelaburan dalam industri ruminan memandangkan struktur geografi negeri Sabah yang bersesuaian.
10. Sebagaimana kita tahu, Sabah adalah bumi bertuah yang dikurniakan tanah yang luas dan subur selain kawasan perairan yang luas yang berpotensi menjadikan wilayah ini sebagai salah satu penggerak penting dalam menampung ketersediaan bekalan makanan negara.
11. Penggunaan teknologi terkini termasuk kaedah-kaedah pertanian yang tepat dan moden akan dapat meningkatkan produktiviti dalam meningkatkan pendapatan golongan peladang, penternak, pesawah dan nelayan di Negeri Sabah.

YBHG DATO'/TUAN/PUAN/HADIRIN SEKALIAN,

BUDGET 2024 'MALAYSIA MADANI'

12. Belanjawan 2024 Malaysia MADANI yang telah dibentangkan oleh YAB Perdana Menteri Dato' Seri Anwar Bin Ibrahim, pada 13 Oktober baru-baru ini mampu menyokong pelaksanaan dan program yang dirancang oleh Kementerian Pertanian Dan Keterjaminan Makanan.
13. Peruntukan RM6.17 Billion yang diterima KPKM akan dapat mengukuhkan fungsinya dalam mendepani isu-isu semasa untuk mendepani cabaran dalam sektor pertanian dan agromakanan.
14. Peningkatan peruntukan sebanyak 14.4 peratus berbanding tahun 2023, dapat membantu KPKM untuk pembangunan rantaian nilai agromakanan secara holistik serta pemeraksanaan agenda kebajikan peladang, pesawah, penternak dan nelayan dengan fokus utama memastikan keterjaminan makanan kepada semua rakyat.
15. Antaranya peruntukan sebanyak **RM400 juta** diberikan untuk **Program Pengukuhan Keterjaminan Makanan** dengan tumpuan khusus untuk meningkatkan pengeluaran makanan tempatan yang masih bergantung kepada sumber import.
16. Di bawah peruntukan ini, sebanyak **RM150 juta** digunakan untuk meningkatkan hasil tanaman dan ternakan melalui kerjasama dengan kerajaan negeri dalam mengoptimum penggunaan tanah; dan selebihnya bagi melaksanakan kaedah baharu perolehan baja secara tender terbuka, dan membekalkan baja bio dan organik kepada 50 ribu pesawah bagi meningkatkan kesuburan tanah.
17. Selain itu, Agrobank juga menyediakan kemudahan pinjaman kepada pengusaha agromakanan dengan ketersediaan dana sehingga **RM430 juta** bagi menyokong peningkatan kapasiti pengeluaran pertanian dan daya saing agropreneur muda.

18. Tambahan pula, Kerajaan Perpaduan komited untuk memberi perlindungan kepada hasil petani, penternak dan nelayan yang berhadapan dengan musibah bencana melalui inisiatif-inisiatif (i) **Tabung Bencana Pertanian** dengan peruntukan RM50 juta bagi memberi pampasan sehingga 50% daripada nilai kerugian akibat bencana; dan (ii) **Skim Takaful Tanaman Padi** dengan peruntukan RM50 juta sebagai dana permulaan untuk manfaat lebih 240 ribu pesawah.
19. Melalui Belanjawan 2024 Malaysia MADANI tersebut juga, saya ingin mengucapkan syabas dan tahniah kepada kerajaan Negeri Sabah kerana memperolehi kelulusan peruntukan pembangunan sebanyak RM6.6 Billion sebagai manifestasi sokongan Kerajaan Persekutuan untuk menyeimbangkan pembangunan di antara wilayah Semenanjung, Sabah dan Sarawak.
20. Peningkatan peruntukan hampir RM100 juta berbanding tahun sebelumnya, akan membawa impak besar kepada Sabah dalam usaha membangunkan ekonomi negeri dan menarik pelabur asing.
21. Selain itu, saya yakin dan percaya; Lembaga Pertubuhan Peladang/Jabatan/Agensi kerajaan di bawah KPKM amat berbesar hati untuk memberi kerjasama penuh dalam semua aktiviti sektor agro makanan yang dikendalikan oleh Kerajaan Negeri serta Unit Penyelarasan Perlaksanaan JPM dalam Program Komuniti MADANI dalam memartabatkan ekonomi Peladang, Penternak Dan Nelayan serta Komuniti setempat.

YBHG DATO'/TUAN/PUAN/HADIRIN SEKALIAN,

HARAPAN DAN KEJAYAAN PROGRAM SENTUHAN AGRO MADANI PERINGKAT NEGERI SABAH 2023

22. Program Sentuhan Agro MADANI ini sewajarnya dijadikan platform mempromosikan program-program di bawah Jabatan/Agensi di selia KPKM agar golongan sasaran Peladang, Penternak dan Nelayan lebih ramai dapat menikmati program dan insentif yang disediakan.

23. Selain ditujukan kepada golongan sasaran KPKM, banyak aktiviti dan program jualan sepanjang Program Sentuhan Agro MADANI juga mendapat sokongan daripada para pemain industri tempatan dan juga Bernas, untuk sama-sama memeriahkan lagi program ini, khasnya untuk warga Kota Kinabalu termasuk hadiah cabutan bertuah yang lumayan, Pesta Makan Durian, dan Jualan Beras Import dengan harga yang sangat-sangat murah, iaitu hanya RM24 sekampit beras.
24. Adalah harapan saya agar Program Sentuhan Agro MADANI Kementerian Pertanian Dan Keterjaminan Makanan (KPKM) untuk mengeratkan kerjasama strategik antara agensi Kerajaan Persekutuan dan Kerajaan Negeri Sabah seumpamanya ini dapat diteruskan dengan jayanya.
25. Akhir kata, saya ingin merakamkan ucapan ribuan terima kasih kepada seluruh warga peladang, petani, dan penternak serta rakan strategik dan pemain industri yang turut sama menyumbang tenaga demi memperkukuh agenda sektor agro makanan demi kemakmuran dan kesejahteraan bersama.
26. Saya juga mendoakan agar `Program Sentuhan Agro MADANI KPKM Negeri Sabah akan berjalan dengan lancar dengan suasana yang kondusif dan semangat kekeluargaan demi kemaslahatan dan kepentingan seluruh masyarakat negeri Sabah.

Dengan ini, saya dengan sukacitanya merasmikan **Program Sentuhan Agro MADANI Peringkat Negeri Sabah Tahun 2023**.

SEKIAN, TERIMA KASIH